

Bil. 39

Rabu

28 November 2018



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

PARLIMEN KEEMPAT BELAS  
PENGKAL PERTAMA  
MESYUARAT KEDUA

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Miskin dan Miskin Tegar Negeri Perak**  
- YB. Tuan Sivakumar Varatharaju Naidu (*Batu Gajah*) [Halaman 1]
- **Penaiktarafan Jalan di Kampung Sedili Besar, Kota Tinggi**  
- YB. Datuk Halimah binti Mohamed Sadique (*Kota Tinggi*) [Halaman 5]

**MALAYSIA  
KAMAR KHAS  
PARLIMEN KEEMPAT BELAS  
PENGKAL PERTAMA  
MESYUARAT KEDUA**

**Rabu, 28 November 2018**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Miskin dan Miskin Tegar di Perak**

**2.35 ptg.**

**Tuan Sivakumar Varatharaju Naidu [Batu Gajah]:** Terima kasih Tuan Yang di-Pertua, terima kasih Yang Berhormat Timbalan Menteri Hal Ehwal Ekonomi kerana sudi datang menjawab soalan saya mengenai isu miskin dan miskin tegar di Perak. Tuan Yang di-Pertua, Perak sebuah negeri yang cukup luas dan sarat dengan khazanah semula jadi di perut dan muka bumi. Suatu ketika dahulu, Perak pernah menjadi negeri yang terpuji kegemilangannya. Akan tetapi hari ini, selepas 60 tahun di bawah pemerintahan Barisan Nasional, negeri Perak telah hilang identiti kecemerlangannya.

Isu kemiskinan dan miskin tegar di negeri Perak perlu diberi perhatian yang serius. Nyatakan perangkaan terperinci mengenai jumlah penduduk miskin dan miskin tegar di seluruh negeri Perak mengikut daerah dan kaum. Berapakah jumlah penduduk negeri Perak yang dikategorikan B40. Apakah tahap atau kedudukan negeri Perak dalam isu ini dibandingkan dengan negeri-negeri lain di Malaysia.

Saya difahamkan Kerajaan Negeri Perak telah mengambil beberapa langkah untuk membasmi kemiskinan. Apakah strategi atau langkah-langkah yang telah diambil oleh Kerajaan Persekutuan untuk membantu membasmi kemiskinan di negeri Perak.

Apakah rancangan-rancangan dan projek-projek pembangunan yang bakal dilaksanakan oleh Kerajaan Persekutuan untuk membawa lonjakan ekonomi di negeri Perak. Pembangunan di luar bandar harus diberi perhatian serius. Lebih banyak peluang pekerjaan

harus diwujudkan supaya anak-anak muda tidak meninggalkan negeri ini untuk mencari pekerjaan di tempat lain. Nyatakan demografi Negeri Perak dan langkah-langkah yang diambil untuk memulihkan keadaan ini. Sekian, terima kasih.

### **2.37 ptg.**

**Timbalan Menteri Hal Ehwal Ekonomi [Dr. Mohd Radzi bin Md Jidin]:** Terima kasih Tuan Yang di-Pertua. Untuk makluman Ahli Yang Berhormat, berdasarkan Laporan Sosioekonomi Perak 2017, jumlah keseluruhan penduduk negeri Perak adalah sekitar 2.5 juta orang yang terdiri daripada 50.8 peratus lelaki dan 49.2 peratus perempuan. Secara demografi, dari segi struktur umur, sejumlah 22.2 peratus terdiri daripada umur muda (0 hingga 14 tahun), 67.9 peratus umur bekerja (15 hingga 64 tahun) dan 9.9 peratus umur tua (65 tahun ke atas). Daripada keseluruhan penduduk Perak, terdapat lebih kurang 619,000 isi rumah. Sekitar 347,000 isi rumah adalah isi rumah berpendapatan 40 peratus terendah (B40). Sebilangan besar B40 Perak merupakan isi rumah bandar dengan jumlah sekitar 252,000 isi rumah berbanding hanya sekitar 94,000 isi rumah B40 luar bandar.

Untuk kumpulan B40, jumlah had pendapatan bulanan isi rumah adalah RM4,360 yang mana boleh dikategorikan kepada empat jenis pendapatan iaitu pendapatan pertengahan rendah, pendapatan rendah, miskin dan miskin tegar.

Berdasarkan metodologi Jabatan Perangkaan Malaysia (DOSM), kaedah pengukuran kemiskinan adalah menggunakan pendapatan garis kemiskinan (PGK). Pengukuran dibuat berasaskan pendapatan isi rumah dan bukan pendapatan individu. Oleh sebab itu, statistik kemiskinan adalah berdasarkan isi rumah dan bukan jumlah penduduk. Isi rumah miskin dikategorikan sebagai isi rumah yang berpendapatan di bawah PGK nasional, manakala miskin tegar adalah isi rumah berpendapatan lebih rendah dari PGK makanan. Paras PGK nasional merangkumi makanan dan bukan makanan adalah RM980 pada tahun 2016. PGK makanan nasional adalah RM600 bagi tahun 2014.

Untuk makluman Ahli Yang Berhormat juga, statistik kemiskinan tegar tahun 2016 tidak lagi dikeluarkan kerana nilai peratus miskin tegar adalah terlalu kecil iaitu di bawah 0.1 peratus. Namun begitu, untuk tujuan penyaluran bantuan melalui sistem eKasih, pihak ICU masih menggunakan data miskin dan miskin tegar berdasarkan Penyiasatan Pendapatan Isi Rumah dan Kemudahan Asas tahun 2014.

### **■1440**

Berdasarkan Laporan Penyiasatan Pendapatan Isi Rumah dan Kemudahan Asas 2016 (PPIR & KA) insiden kemiskinan mutlak bagi Perak bertambah baik dari 0.7 peratus pada

tahun 2014 kepada 0.2 peratus pada tahun 2016. Insiden kemiskinan di bandar dan luar bandar di seluruh Perak turut mencatatkan penurunan masing-masing kepada 0.1 peratus dan 0.5 peratus. Insiden kemiskinan tertinggi pula dicatatkan di Daerah Hulu Perak iaitu 1.6 peratus; kedua tertinggi adalah di Daerah Manjung iaitu 0.3 peratus; diikuti oleh Daerah Kuala Kangsar, Kinta, Hilir Perak dan Kerian iaitu 0.2 peratus dan paling rendah adalah di Daerah Larut Matang, Kampar dan Batang Padang.

Anggaran jumlah keseluruhan isi rumah miskin di Perak pada tahun 2016 mengikut kaum adalah sekitar 1,200 isi rumah yang terdiri daripada 1,000 isi rumah bumiputera, 100 isi rumah India serta selebihnya dari etnik Cina dan etnik-etnik lain.

Secara keseluruhan, perbandingan Perak dengan negeri lain mencatatkan kedudukan sederhana dari segi insiden kemiskinan mutlak dengan menduduki tangga ketujuh iaitu pada 0.19 peratus. Negeri yang mencatatkan insiden kemiskinan tertinggi adalah Sabah (2.94 peratus), kedua tertinggi adalah Sarawak (0.65 peratus) diikuti oleh Kelantan (0.45 peratus) dan Terengganu (0.41 peratus).

### **STRATEGI ATAU LANGKAH-LANGKAH PEMBASMIAN KEMISKINAN**

Untuk makluman Ahli Yang Berhormat, kerajaan komited untuk terus membasmi kemiskinan serta meningkatkan pendapatan rakyat di seluruh negara termasuklah negeri Perak. Ini akan dilaksanakan melalui pemberian bantuan bagi membantu isi rumah miskin serta pelbagai program dan inisiatif bagi meningkatkan pendapatan dan kuasa beli kumpulan isi rumah (B40).

Sehubungan itu, program pembasmian kemiskinan dan peningkatan pendapatan serta penyediaan keperluan asas yang meliputi aspek perumahan, pendidikan dan kesihatan akan terus dilaksanakan. Akses kepada pendidikan dan latihan kemahiran akan diperkukuh sebagai inisiatif utama dalam peningkatan mobiliti sosial. Di samping itu, bantuan pendidikan seperti Kumpulan Wang Amanah Pelajar Miskin dan Rancangan Makanan Tambahan akan diperluas bagi meringankan beban isi rumah miskin dan berpendapatan rendah.

Pada masa yang sama, skim pembiayaan mikro kredit dan program bimbingan usahawan juga akan diteruskan bagi menggalakkan isi rumah miskin dan berpendapatan rendah menceburi bidang perniagaan. Program bantuan termasuk jaringan keselamatan sosial akan ditambah baik bagi meringankan beban isi rumah miskin dan yang berpendapatan rendah bagi memastikan kualiti hidup isi rumah ini tidak terjejas apabila menghadapi ketidaktentuan sosioekonomi.

Dengan pelaksanaan inisiatif-inisiatif di atas, kerajaan yakin insiden kemiskinan akan dapat terus dikurangkan dan pendapatan serta kualiti hidup rakyat B40 dapat ditingkatkan. Ini adalah seiring dengan pendekatan memperkukuh pembangunan inklusif dan kesejahteraan rakyat dalam Kajian Separuh Penggal Rancangan Malaysia Kesebelas, di mana kesemua rakyat walaupun berbeza latar belakang sosioekonomi mendapat manfaat daripada proses pembangunan yang dilaksanakan.

### **RANCANGAN DAN PROJEK PEMBANGUNAN UNTUK MENINGKATKAN EKONOMI NEGERI PERAK**

Tuan Yang di-Pertua, siling peruntukan pembangunan bagi pelaksanaan projek luar bandar antaranya projek Jalan Luar Bandar (JALB), Bekalan Air Luar Bandar (BALB) dan Program Ameniti Sosial yang disalurkan kepada Kerajaan Negeri Perak bagi *Rolling Plan* Keempat (RP4), Rancangan Malaysia Ke-11 (RMKe-11) adalah sebanyak RM56.37 juta. Senarai pecahan projek bagi RP4 RMKe-11 Negeri Perak adalah seperti berikut:

<b>PROGRAM/PROJEK</b>	<b>SILING PERUNTUKAN (JUTA)</b>
Jalan Air Luar Bandar (JALB)	34,300,000
Bekalan Air Luar Bandar (BALB)	7,000,000
Jalan Perhubungan Desa (JPD)	7,000,000
Program Ameniti Sosial (PAMS)	3,000,000
Program Bersepadu Pemajuan Kawasan (PPK)	4,500,000
Program Lonjakan Mega Luar Bandar	100
Naik taraf Premis KEMAS Negeri Perak	470,000
Program Ameniti Sosial FELCRA Negeri Perak	100,000
<b>JUMLAH KESELURUHAN</b>	<b>56,370,100</b>

Selain daripada projek-projek di atas, di antara projek yang ditekankan adalah Projek Pembangunan Infrastruktur dan Kemudahan Pelancongan di Hutan Tropika Belum-Temengor, di Perak fasa 2 yang telah diluluskan di bawah Wilayah Ekonomi Koridor Utara (NCER) dengan kos sebanyak RM20.4 juta. Skop projek termasuklah pelaksanaan aktiviti pemasaran

dan *voluntourism* bagi mempromosikan aktiviti ekopelancongan di Taman Negeri Royal Belum berdasarkan kajian Pelan Induk Bersepadu Hutan Tropika Belum-Temengor.

Sebagai tambahan, projek pembinaan Lebuhraya Pantai Barat sepanjang 170 kilometer yang menghubungkan Banting ke Taiping akan memberi impak positif kepada daerah-daerah di Perak yang merangkumi Daerah Hilir Perak, Bagan Datuk, Perak Tengah, Manjung dan Larut & Matang akan memberi impak berganda kepada ekonomi Perak selain menawarkan lebih banyak peluang pekerjaan. Rancangan Fizikal Negara Ketiga telah mengenal pasti aktiviti perbandaran di Koridor Ipoh-Seri Iskandar-Manjung-Lumut yang berpotensi untuk pembangunan ekonomi negeri Perak.

Pada tahun 2017, jumlah pelaburan bernilai RM2 bilion telah diluluskan oleh Lembaga Pembangunan Pelaburan Malaysia (MIDA) di Perak. Daripada jumlah tersebut, sebanyak RM1.6 bilion (83.4 peratus) adalah daripada pelaburan domestik manakala RM334 juta (16.6 peratus) daripada pelaburan asing. Sumbangan tertinggi keseluruhan pelaburan adalah daripada industri peralatan pengangkutan, diikuti oleh produk elektrik & elektronik dan pembuatan makanan.

Secara umumnya, dengan perancangan dan projek pembangunan yang telah dinyatakan di atas, ianya akan meningkatkan akses infrastruktur kepada bandar dan luar bandar serta menyokong pembangunan ekonomi negeri Perak terutamanya dalam sektor perkhidmatan, pembuatan dan pertanian. Secara tidak langsung ini akan membuka peluang pekerjaan kepada rakyat negeri Perak dan menyokong pertumbuhan dan lonjakan ekonomi Perak. Selain itu, ianya akan mengurangkan kadar migrasi belia Perak ke luar untuk bekerja terutamanya ke Selangor, Pulau Pinang dan Johor. Sekian, terima kasih.

### **Penaiktarafan Jalan di Kampung Sedili Besar, Kota Tinggi**

**2.47 ptg.**

**Datuk Halimah Binti Mohd Sadique [Kota Tinggi]:** Terima kasih Tuan Yang di-Pertua. Minta maaf, lambat sedikit, baru dimaklumkan usul saya naik pula hari ini. *Assalamualaikum warahmatullahi wabarakatuh*, salam sejahtera dan selamat petang. Saya ingin mengemukakan usul saya ini Tuan Yang di-Pertua. Saya ingin membangkitkan isu penaiktarafan jalan di Kampung Sedili Besar, Kota Tinggi, Yang Berhormat Menteri.

Kampung Sedili Besar adalah perkampungan Nelayan, petani kampung dan peniaga kecil. Ianya terletak di dalam Dewan Undangan Negeri Sedili serta kawasan P.156. Kampung ini terpinggir dari segi pembangunannya atas faktor geografi. Kampung ini juga terletak di

dalam kawasan Majlis Daerah Kota Tinggi dengan kutipan hasil sebanyak RM26,326 setahun dan 273 pegangan penduduk di kampung ini adalah seramai 2,184 orang. Sungguhpun demikian, kampung ini juga menjadi tumpuan pelancong tempatan dan luar negara khususnya Singapura pada setiap minggu yang menumpukan kepada aktiviti memancing. Dianggarkan sejumlah 350 hingga 400 orang akan berkunjung pada setiap minggu (Sabtu dan Ahad).

Bagi maksud ini Tuan Yang di-Pertua, saya ingin mengutarakan kepada Yang Berhormat Menteri mengenai cadangan menaik taraf jalan utama di mana ianya telah pun diumumkan oleh Mantan Perdana Menteri semasa lawatan beliau di kampung ini pada November 2017 dengan meluluskan sejumlah peruntukan sebanyak RM2 juta. Akan tetapi sehingga kini, penduduk kampung tertanya-tanya mengapa tiada kerja-kerja menaik taraf jalan dilakukan. Jalan utama sedia ada menuju ke kampung ini adalah berjarak lapan kilometer dan lebarnya 3.5 meter sahaja.

Jadi, soalan saya Tuan Yang di-Pertua, adakah Yang Berhormat Menteri melalui Kementerian Kerja Raya (KKR) akan dan boleh membantu rakyat dalam kawasan saya ini terutama di kawasan Kampung Sedili Besar di dalam merealisasikan projek menaik taraf jalan ke Kampung Sedili Besar dengan mengambil kira aspek meningkatkan lagi taraf hidup penduduk kampung? Terima kasih, Tuan Yang di-Pertua.

■1450

**Timbalan Menteri Kerja Raya [Tuan Haji Mohd. Anuar Mohd. Tahir]:** *Assalamualaikum warahmatullahi wabarakatuh* dan salam sejahtera. *Alhamdulillah*. Tuan Yang di-Pertua, saya berasa bertuah pada hari ini kerana untuk pertama kalinya berpeluang menjawab pertanyaan daripada Ahli Yang Berhormat Kota Tinggi yang sangat komited, yang saya dari dulu mengikuti kesungguhan Yang Berhormat berkhidmat, sama ada di negeri dan sekarang di Dewan Parlimen.

Untuk makluman Ahli Yang Berhormat Kota Tinggi, kementerian ini sudah semestinya wajib, perlu komited dalam melaksanakan projek infrastruktur demi untuk kesejahteraan rakyat. Apatah lagi bila saya mendengar daripada Yang Berhormat tentang kampung yang tidak besar iaitu Kampung Sedili Besar, Kota Tinggi ini yang merupakan perkampungan nelayan, petani dan peniaga kecil. Saya lihat dalam peta lokasi, Kampung Sedili Besar ini saya boleh nampak sebuah perkampungan yang kecil tetapi kecil itu indah. Saya teringat penulis yang sangat mempengaruhi saya zaman tahun 80-an dahulu, bila beliau menulis, '*small is beautiful*', *sure!* Kalaupun saya ada peluang saya teringin sangat hendak lihat kampung nelayan ini.



Walau bagaimanapun, jalan-jalan di persekitaran Kampung Sedili Besar, Kota Tinggi ini termasuk jalan utamanya merupakan jalan negeri, bukan jalan persekutuan. Kalau sekiranya ia merupakan jalan persekutuan yang di bawah bidang kuasa kami, saya percaya, saya harus menjawab hari ini dengan tegas dan tuntas bahawa projek untuk rakyat di kampung nelayan seperti ini harus diberikan keutamaan dan harus dilaksanakan segera.

Akan tetapi oleh kerana kami tidak punya kewewangannya, oleh itu, pihak kementerian setakat ini belum lagi dapat melaksanakan apa-apa penaiktarafan ke atas jalan-jalan tersebut melainkan pihak Kementerian Pembangunan Luar Bandar (KPLB) yang mereka ada *authority on this*, maaflah dengan izin, Tuan Yang di-Pertua atau Kerajaan Negeri Johor sendiri dapat menyediakan peruntukan yang diperlukan bagi membolehkan kerja-kerja tersebut dibuat, Kementerian Kerja Raya akan segera sepantas mungkin melaksanakan tuntutan rakyat ini.

Kita *check*lah Yang Berhormat, apakah peruntukan MARRIS daripada Kerajaan Persekutuan sudah pun sampai ke tangan kerajaan negeri kerana menerusi peruntukan MARRIS yang ditentukan oleh Perlembagaan Negara, Kerajaan Persekutuan wajib, mandatori itu kena menyerahkan peruntukan ini kepada kerajaan negeri. Apakah janji ataupun pengisytiharan yang dibuat sebelum ini telah mendapat atau masuk ke pihak negeri.

Saya percaya Yang Berhormat tentu boleh bercakap dengan ADUN Sedili ataupun ADUN-ADUN lain supaya membangkitkan isu ini di Dewan Undangan Negeri Johor. Kami di Kementerian Kerja Raya akan segera melaksanakan tuntutan ini, *concern*, Yang Berhormat juga *concern* kita bersama sekiranya peruntukan ada menerusi KPLB ataupun daripada Kerajaan Negeri Johor sendiri, KKR *insya-Allah*, akan melaksanakan tuntutan dan keperluan rakyat ini. Ia boleh kita laksanakan. Terima kasih Tuan Yang di-Pertua.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 29 November 2018.

***[Kamar Khas ditangguhkan pada pukul 2.53 petang]***